



Broj: 05/1-50-13-26-52-5/18

Sarajevo, 22. 10. 2018. godine

IZVJEŠTAJ

sa sastanka članova Nezavisnog odbora Parlamentarne skupštine BiH kao nezavisnog tijela policijske strukture BiH s rukovodstvom Granične policije BiH

Sastanak je održan 4. 10. 2018, s početkom u 11 sati, u prostorijama Granične policije BiH u Sarajevu. Prisustvovali su: Zoran Galić, direktor Granične policije BiH, Fahrudin Halač, zamjenik direktora Granične policije BiH, Enes Obraliya, prvi zamjenik predsjednice Nezavisnog odbora, Mato Jozić, drugi zamjenik predsjednice Nezavisnog odbora, i Ljubomir Kuravica, član Nezavisnog odbora, te Ivana Lovrić, sekretarka Nezavisnog odbora.

Direktor Granične policije BiH Zoran Galić poželio je dobrodošlicu članovima Nezavisnog odbora i rekao da je na raspolaganju za sva eventualna pitanja.

Enes Obraliya, prvi zamjenik predsjednice Nezavisnog odbora, ukratko je obrazložio razlog posjete. Rekao je da je posjeta organizirana u skladu s redovnim planskim aktivnostima Nezavisnog odbora s ciljem održavanja kontinuiteta saradnje s policijskim agencijama iz svoje nadležnosti. Također, naglasio je da prvenstveno žele s rukovodstvom Granične policije BiH razgovarati o pitanju koje u zadnje vrijeme opterećuje bh. društvo, a to je problem ilegalnih migracija i koje su aktivnosti koje preduzimaju po tom pitanju.

Direktor Granične policije BiH na početku je istakao da BiH nije kvalitetno odgovorila na izazove u pogledu ilegalnih migracija u BiH mada su na taj problem upozoravali mnogo ranije. Iznio je podatak da je 2016. godine u BiH registrirano 155 ilegalnih migranata, 2017. godine 766, a spriječen ulazak za 450, dok ih je od januara 2018. godine registrirano blizu 16.000, a spriječen ulazak za oko 12.000, te da ih u BiH svaki dan uđe od 180 do 310, što ukazuje na ozbiljnost situacije u BiH. Naglasio je da su na početku policijski službenici Granične policije BiH djelovali represivnije na ilegalne prelaske s ciljem zaštite granične linije. Međutim, u izvještaju Institucije ombudsmena za ljudska prava BiH, koju je Vijeće

ministara BiH zadužilo da nadzire institucije zadužene za kontrolu migracija, naloženo je na koji način treba postupati s ilegalnim migrantima.

Istakao je da su u značajnoj mjeri sve svoje resurse i kapacitete usmjerili u zaštitu državne granice po pitanju ilegalne migracije na ugrožene tačke te da im već tri mjeseca veliku pomoć u tome pružaju policijski službenici Državne agencije za istrage i zaštitu i Direkcije za koordinaciju policijskih tijala BiH i da ostvaruju dobre rezultate. Problem koji je tu dodatno nastao jesu finansijska sredstva za smještaj policijskih službenika koji su na ugroženim područjima, ali se radi na rješavanju tog pitanja.

Također, rukovodstvo Granične policije BiH istaklo je da je s ciljem rješavanja ovog problema potrebno u postojećim propisima koji se odnose na traženje azila izvršiti određene izmjene i dopune, na što su već ukazivali. Istakli su da bi bilo potrebno smanjiti rok za traženje azila za strance s dosadašnjih 14 dana na 24 sata.

Rukovodstvo Granične policije BiH istaklo je da je za detaljan nadzor i kontrolu državne granice potrebno osigurati oko 1.280 policijskih službenika, što je u ovom trenutku finansijski neizvodivo.

Dalje, kada je riječ o zaposlenim u Graničnoj policiji BiH, direktor je istakao da u ovom trenutku u odnosu na radna mjesta sistematizirana Pravilnikom o unutrašnjoj organizaciji i sistematizaciji nisu popunjena 434 mjesta policijskih službenika, a što bi se donekle moglo prevazići novim Zakonom o policijskim službenicima BiH kojim je predviđen eksterni premještaj policijskih službenika unutar policijskih agencija.

Direktor je naglasio i da ih je, kada je u pitanju krijumčarenje ljudi i robe, pohvalio SELEC kao druga najuspješnija policijska agencija, odnosno država po pitanju operativnih aktivnosti u borbi protiv organiziranog prekograničnog kriminala.

Na upit članova Nezavisnog odbora kakav je međusobni odnos između direktora i zamjenika direktora Granične policije BiH, rukovodioci navedene policijske agencije su se pred članovima Nezavisnog odbora obavezali na korektan i profesionalan odnos uz međusobno uvažavanje.

Sastanak je završen u 13 sati.

PRVI ZAMJENIK PREDsjednice

NEZAVISNOG ODBORA

Enes Obralića

